



ՄԱՍԻՆԱՎՈՐ ՎԱՐԴԱՊԵՏԱԿԱՆ ԱՍՏԻՃԱՆԻ ՏՎՉՈՒԹՅՈՒՆ

Սույն թվականի փետրվարի 28-ին, երեքշաբթի օրը, հոգևոր ճեմարանի հանդիսությունների դահլիճում, նախագահությամբ Մայր Աթոռի դիվանապետ գերազնորին Ս. Ներսես արքեպս. Պոզապայանի, տեղի ունեցավ վարդապետական թեզերի պաշտպանություն:

Հանդիսությանը ներկա էին Մայր տաճարի լուսարարապետ գերազնորին Ս. Հուսիկ արքեպս. Սանթուրյանը, Եգիպտոսի հայոց թեմի առաջնորդ գերազնորին Ս. Զավեն արքեպս. Զինչիճյանը, Մայր Աթոռի միաբանությունը, հոգևոր ճեմարանի դասախոսական կազմը, ուսանողությունը և հյուրեր:

Ս. Էջմիածնի երիտասարդ միաբաններ Ս. Արարատ արք. Գալթագճյանն ու Ս. Օշական արք. Գյուլգյույանը իրենց պատրաստած վարդապետական թեզերը նախօրոք ներկայացրել էին Վեհափառ Հայրապետին: Նորին Աթոռության կարգադրությամբ կազմվել էր քննիչ հանձնախումբ, որի կազմում էին՝ Արարատյան հայրապետական թեմի առաջնորդական փոխանորդ գերազնորին Ս. Գարեգին եպս. Ներսիսյանը (հանձնախմբի նախագահ), Մայր Աթոռի Միջեկեղեցական հարաբերությունների բաժնի ընդհանուր քարտուղար պրն. Պարզև Ծափազյանը և «Էջմիածին» ամսագրի խմբագիր, բանասիրական գիտությունների թեկնածու պրն. Երվանդ Մելքոնյանը:

Վարդապետական թեզերի բանավոր պաշտպանությունն սկսվեց ժամը 11-ին: Հանձնաժողովի կարծիքի ընթերցումից հետո նախ իր թեզի բանավոր պաշտպանությամբ հանդես եկավ Ս. Արարատ արք. Գալթագճյանը և պատասխանեց տրված հարցերին:

Ս. Արարատ արք. Գալթագճյանի ներկայացրած աշխատանքը նվիրված էր Ատորական Եկեղեցու պատմությանը՝ «Անտիոքի Եկեղեցու պատմություն» վերնագրով: Աշխատանքը բաղկացած էր 120 մեքենագիր էջերից:


Այնուհետև, հանձնաժողովի կարծիքի ընթերցումից հետո, իր թեզի բանավոր պաշտպանությամբ հանդես եկավ Ս. Օշական արք. Գյուլգյույանը: Ս. Օշական արքեպս. նախ ներկայացրեց իր ուսումնասիրության բովանդակությունը, ապա պատասխանեց տրված հարցերին:

Ս. Օշական արք. Գյուլգյույանի ներկայացրած աշխատանքը նվիրված էր Աղթամարի Աթոռի պատմությանը՝ «Աղթամարի կաթողիկոսությունը» վերնագրով:

Աշխատանքը բաղկացած էր 62 մեքենագիր էջերից:

Երկու թեզերի պաշտպանությունից հետո հանձնաժողովը ներկայացված աշխատանքները գնահատեց ԼԱՎ:

Փետրվարի 24-ին, չորեքշաբթի օրը, Օշականի Ս. Մեսրոպ Մաշտոց եկեղեցում տեղի ունեցավ մասնավոր վարդապետա-



Վարդապետական աստիճանի տվյալներից հետո՝ Օշականում

կան աստիճանի տվյալների արարողությունը: Վեհափառ Հայրապետի բարձր կարգադրությամբ Մայր Աթոռի դիվանապետ գերազնորի Տ. Ներսես արքեպս. Պոգոսյանը վարդապետական աստիճան շնորհեց Տ. Սասուն արք. Զմրուխտյանին, Տ. Արարատ արք. Գալստյանին և Տ. Օշական արք. Գյուլգյույանին:

Արարողության ավարտից հետո գերազնորի սրբազան հայրը հետևյալ բովանդակալից խոսքն ուղղեց նորոգմա վարդապետներին.

«Յանուն Հօր և Որդու և Հոգու Սրբոյ, ամեն»

«Որք առիք զպատուէր քարոզել աներկիւզ զբանն կենաց յաշխարհի...»

«Ի՞նչ էք, որ պատուէր ստացաք՝ աներկիւզ կերպով քարոզելու կենաց խոսքը աշխարհում»:

Սիրելի հոգևոր եղբայրներ և հավատացյալ ժողովուրդ:

Այսօր վերստին եկել ենք Օշական, Ս. Մեսրոպ Մաշտոցի շիրմին վրա կառուցված այս խնկարույր տաճարի կամարների տակ՝ կատարելու մասնավոր վարդապետության չորս աստիճանների տվյալների կարգը:

Քիչ առաջ, մեր Եկեղեցու կանոնի համաձայն, հոգեպարար աղոթքներով, սուրբ գրական ընթերցվածներով և սրտառու շարականների երգեցողությամբ ձեզ պարգևեցինք Ս. Հոգու շնորհները, իբրև գնահատանք ձեր ծառայությանց, կատարած հովվական աշխատանքին և քարոզչական գործունեության, այսպիսով այսօրվանից դուք դարձաք Հայ Եկեղեցու վարդապետներ:

Մանավանդ Օշականի այս սրբազան վայրում, մեր եռամեծ վարդապետի շիրմի մոտ, անհրաժեշտ է, որ անդրադառնանք վարդապետական աստիճանի կարևորության և քարծրության և փորձենք մտովի համեմատել մեզ Նրա հետ, զգալու համար մեր փոքրությունն ու տկարությունը: Այստեղ, բոլորս փոքրանում ենք ներքին անդրադարձի միջոցով և ուխտում, որ կյանքում փորձենք գեթ դուրսից՝ չափով նմանվել Նրան:

Ահա, այս գիտակցությամբ վաղվանից վերսկսելու էք ձեր աշխատանքը Հայաստանյայց Եկեղեցու ծոցում, այն համոզումով, որ դուք Աստուծո ձեռքում դրված գործիքներ եք՝ պատրաստ սպասարկելու մարդկության:

Ձեզանից առաջինը ծառայում է Կալիֆոռնիայի մայրաքաղաք Սակրամենտո-

յում, երկրորդը՝ Սիրիայի մայրաքաղաք Դամասկոսում, իսկ երրորդը՝ Կանադայի Վանկուվեր քաղաքում:

Ահավասիկ տեսեք, թե Հայաստանյայց Եկեղեցու խորանի Լուսավորչյան լույսը և Սուրբ Մեսրոպի գիրն ու լեզուն մինչև ուր ձեզ հետ ճամփորդելու են և ինչպիսի ազնիվ ազգային-կրոնական դաստիարակչական պարտականություն է դրված ձեր ուսերի վրա: Գիտության ջահը, որ վառեցին մեր նախնիք գրերի գյուտով, այդ ջահը գրականության ստեղծումով, այդ ջահը վերստին արծարծեցեք այս սրբազան վայրում և այն տարեք ձեզ հետ ողջ աշխարհով մեկ: Նաև հավատի այն լույսը, որ վառեցին առաքյալները Հայաստանում, դեռևս առաջին դարում, և նույն հավատի լույսը, որ նախաձեռնություններով մեր հավատի հայրը՝ Սուրբ Գրիգոր Լուսավորիչ, մեզ ավանդեց, որի լույսը մինչև այսօր տակավին պլավում է Արագածի կատարին, տեսանելի միայն նրանց, որոնք հավատի աչքեր ունեն, այդ լույսը տարեք ձեզ հետ Հայաստան աշխարհից, դեպի մեր պանդուխտ հայրդիները ի սփյուռս աշխարհի:

Մեր ցանկությունն է և մաղթանքը, որ դուք, իբրև նորապսակ վարդապետներ Հայաստանյայց Եկեղեցու, լինեք խոնարհ ու համեստ կամոք, բայց հպարտ ձեր Եկեղեցիով և ժողովրդի անցյալով, բոլորանվեր սրտով ծառայելու համար Տիրոջ անդաստանում:

Այս պահին Մայր Աթոռի միաբանության, իմ և ներկա հավատացյալների անունից շնորհավորում եմ ձեզ՝ մաղթելով Աստուծո օգնականությունը ձեզի: Թող Տերը ձեզ գորավիզ կանգնի ձեր կյանքի ընթացքում և այն հովվական գավազանով, որ ստացաք, Մովսեսի նման մեր ժողովուրդը առաջնորդեցեք և մխիթարեցեք, մի օր, երբ հուսո ղոները բացվեն, առաջնորդելով նրանց դեպի երկիրն ավետյաց՝ Հայաստան աշխարհ: Ձեր ձեռքի գավազանը երբեմն թող նմանվի անապատում Մովսեսի քարծրացրած պղնձյա օձով փաթաթված գավազանին, որ բժշկություն բերավ իր ժողովրդին:

Բայց մանավանդ ձեր ձեռքի գավազանը թող նմանվի Քրիստոսի խաչափայտին, որ եղավ ոչ թե չարչարանքի և տկարության նշան, այլ ընդհակառակը՝ փրկության և հաղթության նշան, ողջ մարդկության համար: Ահա այս խորհուրդները կրող ձեր ձեռքի գավազանը պիտի բանա Աստուծո օգնությամբ ձեր կյանքի գիտակցված ծառայության ուղին:

Դուք, որ ի վերուստ ստացել եք աներկյուղ կերպով քարոզելու իրավունքը կենաց Բանին, այսօրվանից ձեր առաջ պիտի բացվեն դռները այն իրագործելու:

«Շնորհք, սէր և խաղաղութիւն Տեառն մերոյ Յիսուսի Բրիստոսի, եղիցին ընդ ձեզ ընդ ամենեւեանդ», ամեն:

* * *

«Էջմիածին» ամսագրի խմբագրությունը շնորհավորում է նորընծա վարդապետներին՝ մաղթելով, որ բազմապատկված եռանդով այսուհետև ևս շարունակեն իրենց ազգօգուտ ու եկեղեցական գործունեությունը:

